



Los ntawm Thawj Tswj Hwm Thomas S. Monson

# Lub Tuam Tsev Dawb Huv—Ib lub Teeb uas Ci rau lub Ntiaj Teb

*Tej koob hmoov uas tseem ceeb thiab zoo tag nrho rau ib tug mej zeej hauv lub Koom Txoos yog tej koob hmoov uas peb txais hauv Vajtsuv cov tuam tsev ntag.*

**K**uv cov kwv tij thiab cov muam, kuv xav qhia rau nej paub tias kuv hlub nej txhua tus thiab zoo siab tos txais nej thiab thov kom peb Leej Txiv Saum Ntuj Ceeb Tsheej yuav coj kuv tej kev xav thiab txhawb nqa cov lus uas kuv yuav hais hnuv no.

Kuv xav pib hais ob peb lo txog tej zaj xov zoo kawg nkaus uas peb tau hnov tag kis no thaum uas Muam Allred thiab Npis Sov Burton hais txog lub Koom Txoos txoj Kev Pab Tib Neeg Txais Welfare. Raws li twb hais lawm, xyoo no ces twb muaj txoj kev pab no tau 75 xyoos los lawm uas twb foom koob hmoov rau coob leej los lawm. Kuv twb paub ib txhia neeg uas tau tsim txoj kev pab no—cov txiv neej uas muaj kev khuv leej thiab txawj pom yav tom ntej.

Yam li Npis Sov Burton thiab Muam Allred hais, tus npis sov hauv ib pawg ntseeg muaj kev lav ris yuav

tsum saib xyuas cov neeg uas xav tau kev pab hauv lawv pawg ntseeg. Kuv twb muaj cib fim ua li ntawd thaum kuv yog ib tug npis sov hluas hluas rau ib pawg ntseeg Salt Lake uas muaj 1,080 tus mej zeej, kuj muaj 84 tus poj ntsuam. Muaj neeg coob uas xav tau kev pab. Kuv tau ua Vajtsuv tsaug vim muaj lub Koom Txoos qhov kev pab welfare no thiab qhov uas lub Koom Haum Niam Tsev thiab tej pawg pov thawj hwj tau los pab thiab.

Kuv tshaj tawm hais tias qhov kev pab Welfare hauv Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg yog ib yam uas Vajtsuv tus uas Muaj Hwj Chim Loj Tshaj Plaws tau tsim.

Nim no kuv cov kwv tij thiab cov muam, peb xyoos tas los lawm hauv lub rooj sab laj no kuv raug tsa los ua tus Thawj Tswj Hwm hauv lub Koom Txoos. Peb xyoos no kuv tau ua hauj

lwm ntau kawg, muaj ntau yam kev cov nyom tab sis mas tseem muaj koob hmoov ntau nplua mias thiab. Ib qho uas kuv nyiam ua tshaj plaws thiab yog ib txoj koob hmoov rau kuv yog txoj kev muab cov tuam tsev fij tseg, thiab hnuv no kuv xav hais qhia nej txog cov tuam tsev.

Thaum lub tuam rooj sab laj lub Kaum Hli Ntuj xyoo 1902, lub Koom Txoos tus Thawj Tswj Hwm Joseph F. Smith tau pib nws cov lus thaum nws qhia tias nws cia siab tias yuav tsum muaj ib hnuv twg uas “yuav ua cov tuam tsev hauv ntau qhov chaw hauv ntiaj teb no kom thiaj yuav yooj yim rau peb cov neeg tau mus xyuas.”<sup>1</sup>

Hauv thawj 150 xyoo tom qab txhim tsa lub Koom Txoos, thaum xyoo 1830 mus txog 1980, lawv tau ua 21 ib lub tuam tsev, kuj suav cov tuam tsev hauv Kirtland, Ohio, thiab Nauvoo, Illinois. Muab qhov ntawd piv rau 30 xyoo txij thaum 1980, peb tau ua 115 lub tuam tsev uas tau muab fij tseg lawm. Yog suav 3 lub uas tau tshaj tawm txog nag hmo, ces tab tom muaj 26 lub ntxiv uas twb pib ua los sis tab tom npaj yuav ua. Thiab tseem yuav ua ib co ntxiv thiab.

Lub hom phiaj uas Thawj Tswj Hwm Joseph F. Smith tsa thaum xyoo 1902 tab tom muaj lawm tiag. Peb xav kom cov tuam tsev yuav nyob ze npaum li ze tau rau peb cov mej zeej.

Peb tab tom ua ib lub tuam tsev hauv lub zos Manaus, Brazil. Ntau xyoo tas los lawm kuv tau nyeem txog ib pawg neeg uas muaj coob tshaj ib pua leej uas tau sawv kev ntawm lub zos Manaus, uas nyob hauv plawv hav zoov Amazon, es tau taug kev mus rau lub tuam tsev ze tshaj plaws, hauv

São Paulo, Brazil—uas nyob deb li 2,500 mais ntawm lub zos Manaus. Ib Tsoom Haiv Neeg Ntseeg ntawd tau caij nkoj plaub hnuv plaub hmos raws tus dej Amazon. Tom qab caij nkoj tas lawv tau caij tsheb npav uas muaj neeg coob thiab taug tej kev phem rau peb hnuv ntxiv—yeej tsis tshua muaj zaub mov noj thiab chaw zoo pw tsaug zog. om qab xya hnuv xya hmo lawv tuaj txog lub tuam tsev hauv São Paulo, nyob ntawd lawv tau ua tej kab ke uas yuav kav mus ib txhis. Lawv txoj kev taug kev mus tsev los yeej nyuaj kawg thiab. Tiam sis, lawv nyuam qhuav tau tej kab ke thiab koob hmoov hauv lub tuam tsev, ces txawm lawv tsis muaj nyiaj lawm, los lawv muaj tus ntsuj plig uas los rau yus thaum yus mus hauv lub tuam tsev thiab lawv muaj kev ris txiaj rau tej koob hmoov uas lawv tau txais lawm.<sup>2</sup> Nim no, ntau xyoo tom qab ntawd, peb cov mej zeej hauv Manaus yeej zoo siab heev vim lawv pom peb tab tom ua ib lub tuam tsev nyob ntawm ntug dej tus Dej Rio Negro. Cov tuam tsev coj kev zoo siab los rau peb cov mej zeej uas nyob ze cov tuam tsev.

Muaj ntau zaj dab neeg uas piav txog cov neeg ua txi ntau yam kom lawv thiaj tau tej koob hmoov uas yus nrhiav tau hauv Vajtswv cov tuam tuam nkaus xwb uas yeej raug kuv lub siab thiab ua rau kuv ua Vajtswv tsaug vim muaj cov tuam tsev no.

Kuv xav qhia zaj uas paiv txog Tihi thiab Taraina Mou Tham thiab nkawd 10 tus me nyuam. Tag nrho lawv tsev neeg tuaj koom lub Koom Txoos thaum 1960 tawm thaum uas cov tub txib tuaj rau lawv lub koog pov txwv, uas nyob li 100 mais nram qab teb ntawm teb chaws Tahiti. Tsis ntev ces lawv xav txais yuav tej koob hmoov uas los thaum yus ua ib tse neeg uas raug muab khi ua ke rau lub neej nyob mus ib txhis hauv lub tuam tsev.

Thaum ntawd, lub tuam tsev ze tshaj plaws rau yim neeg Mou Tham yog lub Tuam Tsev hauv Hamilton New Zealand, uas nyob li 2,500 mais nram qab teb tim sab hnuv poob, yus tsuas caij tau dav hlau kim kim thiaj

mus txog. Yim neeg Mou Tham, tsis tshua muaj nyiaj vim lawv ua teb, ces tsis muaj nyiaj them nqi dav hlau li, thiab tsis muaj tsev hauj lwm hauv lawv koog pov txwv kom lawv thiaj khwv tau nyiaj. Ces Tij Laug Mou Tham thiab nws tus tub Gerard tau txiav txim mus nrog ib tug tub ntxiv mus khawb hlau hauv ib qho chaw hu ua New Caledonia, uas nyob li 3,000 mais tim sab hnuv poob. Tus neeg uas ntiav lawv tau them tus nqi caij dav hlau tuaj yuav khawb hlau tiam sis tsis kam them tus nqi rov qab los tsev.

Peb tug txiv neej Mou Tham no tau ua hauj lwm puv plaub xyoos khawb cov hlau hnyav hnyav ntawd Tij Laug Mou Tham tib leeg xwb thiaj tau mus xyuas tsev ib zaug tauj ib xyoo xwb, tseg nws ob tug tub nyob twj ywm hauv New Caledonia.

Tom qab ua hauj lwm khwv khwv plaub xyoo lawm, Tij Laug Mou Tham thiab nws ob tug tub twb muaj nyiaj txaus yuav coj lawv tsev neeg mus rau lub tuam tsev hauv New Zealand. Txhua tus tau mus tsuas tshuav ib tug ntxhais. Lawv raug muab khi ua ke rau lub neej no thiab rau tas mus ib txhis, thiab txawm muaj kev zoo siab ntau.

Tij Laug Mou Tham tau ncaj qha rov qab mus ua hauj lwm hauv New Caledonia, es tau ua hauj lwm ob xyoos ntxiv kom thiaj coj tau nws tus ntxhais uas tsis tau tuaj mus rau lub tuam tsev thiab—nws tus ntxhais no twb yuav txiv thiab muaj ib tug me nyuam lawm.

Thaum nkawd laus lawm, Tij Laug thiab Muam Mou Tham xav ua hauj lwm hauv lub tuam tsev. Thaum ntawd ces twb ua thiab muab lub Tuam Tsev hauv Papeete Tahiti fij tseg lawm, ces nkawd tau ua hauj lwm ua tub txib hauv lub tuam tsev ob zaug.<sup>3</sup>

Kuv cov kwv tij thiab cov muam, cov tuam tsev yeej yog ib yam ntau tshaj pob zeb thiab xis mas. Nyob hauv muaj kev ntseeg thiab kev yoo mov puv nkaus. Muab kev sim siab thiab lus tim khawv coj los ua cov no. Twb yog kev txi thiab kev ua hauj lwm thiaj muab cov no ua chaw dawb chaw huv.

Thawj thawj lub tuam tsev hauv lub caij nyoog kawg no yog lub uas lawv ua hauv Kirtland, Ohio. Ib Tsoom Haiv Neeg Ntseeg yeej pluag heev, tiam sis tus Tswv twb txib kom lawv yuav ua ib lub tuam tsev lawm, ces lawv tau ua. Txwj Laug Heber C. Kimball sau hais tias, “Tus Tswv nkaus xwb thiaj paub tias peb tau pluag npaum li cas, raug kev sim siab thiab kev nyuaj siab npaum li cas kom thiaj ua tau txoj hauj lwm no.”<sup>4</sup> Thiab ces, tom qab ua txhua yam tsav tiav tas lawm, ib Tsoom Haiv Neeg Ntseeg raug ntiab tawm ntawm Ohio mus thiab tau tso lub tuam tsev pov tseg. Thaum kawg lawv nrhiav tau chaw so—txawm yog rau ib nyuag ntu xwb—rau ntawm ntug dej Mississippi hauv lub xeev Illinois. Lawv tis npe rau lawv lub zos hu ua Nauvoo thiab, tau rov qab muab txhua yam tsav uas lawv muaj, vim lawv muaj kev ntseeg, lawv thiaj tau ua dua ib lub tuam tsev rau lawv tus Vajtswv. Tiam sis, tib neeg tau pib tsim txom lawv dua, thaum nyuam qhuav ua lub Tuam Tsev hauv Nauvoo tiav tas, lawv raug ntiab tawm ntawm lawv vaj lawv tsev dua, ces lawv thiaj tau nrhiav chaw so hauv roob moj sab qhua.

Lawv tau rov qab sib zog thiab txi ntau yam rau 40 xyoo thaum lawv ua lub tuam tsev Salt Lake zoo nkauj kawg uas nyob ib nplov kev tim sab qab teb ntawm lub Tsev Rau Rooj Sab Laj uas hnuv no peb sib ntsib ua ke hauv.

Ib txwm muaj kev txi thaum twg yuav ua ib lub tuam tsev los sis mus xyuas ib lub tuam tsev. Yeej suav tsis txheeb seb muaj neeg coob npaum li cas uas tau ua hauj lwm thiab txi ntau yam xwv kom lawv thiab lawv tsev neeg yuav txais tau tej koob hmoov uas yus nrhiav tau hauv Vajtswv cov tuam tsev.

Ua cas tib neeg coob npaud thiaj kam txi ntau yam kom lawv tau tej koob hmoov hauv lub tuam tsev? Cov neeg uas to taub cov koob hmoov uas kav mus ib txhis hauv lub tuam tsev paub tias ib txoj kev txi twg yeej tsis loj txaus, tsis muaj ib tug nqi uas kim dhau, tsis muaj hauj lwm uas nyuaj dhau uas yuav pauv tau tej koob

hmoov ntawd chaw. Tsis muaj kev taug uas deb dhau, tsis muaj khoom uas thaiv lawv kev ntau dhau los sis kev nyuaj siab heev uas nyiaj tsis tau. Vim lawv to taub tias tej kab ke cawm neeg txoj sia uas yus txais hauv lub tuam tsev yuav cia peb ua ib tse neeg rov qab mus nrog peb Leej Txiv Saum Ntuj Ceeb Tsheej nyob ua ke thiab yuav txais tej koob hmoov thiab hwj chim uas los saum ntu los thiab tsim nyog peb siv zog ua hauj lwm thiab txi txhua yam kom peb tau tej no.

Niaj hnuv no peb sawv daws feem coob tsis tas yuav raug kev txom nyem ntau peb thiaj mus tau rau hauv lub tuam tsev. Yim caum tsib feem pua tus mej zeej hauv lub Koom Txoos tsis nyob deb tshaj li 200 mais ntawm ib lub tuam tsev, thiab rau peb coob leej, peb tsis nyob deb pes tsawg.

Yog tias koj nyob ze ib lub tuam tsev, tej zaum qhov uas nej yuav tsum muab txi yog nej lub sij hawm kom nej thiaj tau ib sij mus rau hauv lub tuam tsev. Muaj ntau yam hauj lwm uas peb yuav tsum ua hauv cov tuam tsev pab cov neeg uas twb tso lub neej no tseg lawm. Thaum peb ua hauj lwm sawv lawv cev, peb yuav paub tias peb tau ua ib yam dab tsi uas lawv ua tsis taus rau lawv tus kheej. Thawj Tswj Hwm Joesph F. Smith tau tshaj tawm hais tias: "Dhau los ntawm peb tej hauj lwm sawv lawv cev ces yuav daw tau tej hluas uas muab lawv khi cia, thiab yuav tshem txoj kev tsaus ntu mus, ces qhov kaj yuav ci los thiab cov uas nyob hauv lub ntu ntu plig yuav pom tej hauj lwm uas lawv cov me nyuam hauv ntiaj teb no tau ua rau lawv lawm, thiab lawv yuav muaj kev zoo siab vim nej tau ua tej hauj lwm no."<sup>5</sup> Kuv cov kwv tij thiab cov muam, peb yuav tsum ua txoj hauj lwm no.

Nyob hauv kuv tsev neeg, lub sij hawm uas dawb ceev tshaj plaws yog tej lub sij hawm uas peb tau sib koom tes mus rau hauv lub tuam tsev thiab tau ua tej kab ke khi tsev neeg ua ke rau peb cov poj koob yawm txwv.

Yog tias koj tsis tau mus hauv lub tuam tsev dua li, los sis yog tias koj *twb mus* dua tiam sis tam sim no koj tsis

tsim nyog tuav ib daim ntawv tso cai nkag mus hauv, tsis muaj ib lub hom phiaj tseem ceeb dua txoj kev rau siab ntso ua kom koj yuav ua neeg tsim nyog mus rau hauv lub tuam tsev. Tej zaum koj txoj kev txi yog kho koj lub neej kom koj thiaj tau ib daim ntawv tso cai, tej zaum yuav tsum tso tej yam tseg uas tiv thaiv tsis pub koj txais ib daim. Tej zaum yog qhov uas koj yuav tsum muaj kev ntseeg thiab tswj koj tus kheej kom them ib feem kaum. Txawm yog dab tsi los xij peem, cia li ua kom koj tsim nyog nkag mus hauv Vajtswv lub tuam tsev. Yuav tau ib daim ntawv tso cai thiab sailb daim ntawv ntawd ua ib yam uas muaj nuj nqi heev, rau qhov nws yeej muaj nqi heev.

Txog rau thaum koj tau mus hauv tus Tswv lub Tsev thiab txais yuav txhua yam koob hmoov uas nyob rau hauv ces, koj yeej tsis tau yuav txhua yam uas lub Koom Txoos muaj. Tej koob hmoov uas tseem ceeb thiab zoo tag nrho rau ib tug mej zeej hauv lub Koom Txoos yog tej koob hmoov uas peb txais hauv Vajtswv cov tuam tsev ntag.

Nim no, kuv cov me phooj ywg es cov uas tseem yog tub thiab ntxhais hluas, nej yuav tsum xav ntsoov txog lub tuam tsev. Tsis txhob ua ib yam dab tsi uas yuav thaiv nej kev es tsis pub nej nkag mus hauv thiab txais yuav tej koob hmoov dawb ceev thiab cov uas kav mus ib txhis uas nej txais tau hauv. Kuv qhuas nej cov uas tam sim no ib sij mus hauv lub tuam tsev ua kev cai raus dej rau cov neeg uas tuag lawm, nej sawv ntxov ntxov mus ua kev cai raus dej ua ntej nej mus kawm ntawv. Kuv xam tsis tau txog ib qho zoo dua uas yuav ua pib ib hnuv twg.

Nej cov niam txiv uas muaj me nyuam me me, kuv xav qhia nej txog ib co lus qhuab ntuas zoo uas Thawj Tswj Hwm Spencer W. Kimball. hais tias: "Yuav yog ib qho zoo yog tias . . . niam txiv yuav dai ib daim duab txog lub tuam tsev hauv lawv txhua tus me nyuam chav pw, xwv kom [lawv cov me nyuam] txij thaum lawv ua me nyuam mos liab, lawv yuav ntsia daim duab ntawd thiab nws yuav ua ib

qho ntawm [lawv lub neej kiag]. Ces thaum [lawv loj hlob] txaus [lawv yuav tsum] txiav txim zoo txog [txoj] kev mus [hauv lub tuam tsev], mas lawv tsis tas txiav txim li vim lawv twb txiav txim siab lawm."<sup>6</sup>

Peb cov me nyuam hu nkauj hauv lub Koom Haum Me Nyuam Yaus hais tias:

*Kuv nyiam saib lub tuam tsev.  
Yeej yuav muaj ib hnuv uas kuv  
yuav mus hauv.  
Kuv yuav nrog kuv Leej Txiv sib khi  
lus tseg;  
Kuv yuav cog lus tias kuv yuav  
mloog lus.*<sup>7</sup>

Kuv taij thov kom nej yuav qhia nej cov me nyuam tias lub tuam tsev tseem ceeb npaum li cas.

Lub ntiaj teb yog ib qho chaw nyuaj ua neej nyob thiab muaj teeb meem ntau. Tej thaum tej yam phem nyob ntawm peb ib puag ncig. Thaum koj thiab kuv mus hauv Vajtswv cov tsev dawb huv no, thaum peb nco qab txog tej kev khi lus uas peb tau khi tseg hauv, peb haj yam yuav txawj tiv mus dhau txhua txoj kev cov nyom uas peb ntsib thiab yuav kov yeej txhua txoj kev haub ntxias uas peb raug. Nyob hauv qhov chaw dawb ceev no, peb yuav tau dag tau zog thiab yuav rov qab kho peb lub siab kom zoo.

Nim no, kuv cov kwv tij thiab cov muam, kuv xav hais lus me ntsis txog ib lub tuam tsev ntxiv ua ntej kuv xaus kuv cov lus. Tsis ntev tom ntej no, thaum ua cov tuam tsev tshiab thooob plaws lub ntiaj teb, yuav ua ib lub hauv ib lub nroog uas twb qub npaum li 2,500 xyoo. Kuv hais txog lub tuam tsev uas peb tab tom ua hauv lub nroog Loos, Italy teb.

Txhua lub tuam tsev yog Vajtswv ib lub tsev, ua tej hauj lwm zoo ib yam thiab txais tau tib co koob hmoov thiab kab ke. Lub Tuam Tsev Loos, txawv rau qhov yuav ua hauv ib qho chaw tseem ceeb heev hauv lub ntiaj teb, twb yog ib lub nroog uas puag thaum ub tus thwj tim Petus thiab Pov Lauj tau tuaj tshaj tawm Yexus txoj moo zoo hauv

thiab ob leeg tib si raug luag muab lawv tua pov tseg hauv.

Lub Kaum Hli Ntuj tas los lawm, thaum peb sib sau ua ke ntawm qaum teb tim sab hnuv tuaj hauv lub nroog Loos, kuv muaj cib fim los thov Vajtswv muab qhov chaw ntawd fij tseg yuav pib ua lub tuam tsev. Kuv raug kev tshoov siab kom caw cov neeg Italy tus Nom Lucio Malan thiab lub nroog Loos tus hau zos Giuseppe Ciardi tuaj pab ua thawj cov neeg uas khawb ib co av. Ob leeg no tau pab tso lus rau peb ua ib lub tuam tsev hauv nkawd lub nroog no.

Hnuv ntawd pos huab tiam sis tseem sov, thiab txawm zoo nkaus li yuav los nag los, tsuas muaj ob peb tee dej los xwb. Thaum pawg neeg hu nkauj ua lus Italy, lawv hu zaj "Vajtswv tus Ntsuj Plig," es thaum ntawd zoo nkaus li lub ntiaj teb thiab lub ntuj ceeb tsheej tau sib koom siab hu nkauj qhuas thiab ua Vajtswv tus uas Muaj Hwj Chim Loj Tshaj Plaws tsaug. Yus npo tsis tau yus cov kua muag.

Yav tom ntej no, cov neeg uas rau siab ntseeg hauv lub "Nroog uas Kav

Mus Ib Txhis" no, yuav txais tej kab ke uas kav mus ib txhis hauv Vajtswv ib lub tsev dawb huv.

Kuv xav qhia kuv txoj kev ris txiaj rau kuv Leej Txiv Nyob Saum Ntuj Ceeb Tsheej vim tab tom ua lub tuam tsev hauv lub nroog Loos thiab rau peb txhua lub tuam tsev, txawm nyob qhov twg los xij. Txhua lub sawv los ua ib lub teeb rau lub ntiaj teb, uas pab qhia peb zaj lus tim khawv tias Vajtswv peb Leej Txiv uas Nyob Mus Ib Txhis yeej muaj sia nyob, tias Nws xav foom koob hmoov rau peb thiab, muaj tseeb tiag, xav foom koob hmoov rau Nws cov tub cov ntxhais hauv txhua tiam neeg. Peb txhua lub tuam tsev qhia peb zaj lus tim khawv tias yeej muaj ib lub neej tom qab yus tso lub neej no tseg thiab yeej muaj li ntawd tiag ib yam li muaj lub neej hauv ntiaj teb no. Kuv hais lus tim khawv li ntawd.

Kuv cov kwv tij thiab cov muam, thov kom peb yuav txi txhua yam peb yuav tsum txi kom thiaj mus tau rau hauv lub tuam tsev thiab kom tus ntsuj plig uas nyob hauv lub

tuam tsev yuav nyob rau nraim rau hauv peb lub siab lub ntsws thiab hauv peb vaj peb tsev. Thov kom peb yuav lawv peb tus Tswv thiab tus Cawm Seej, Yexus Khetos, qab vim nws tau muab txoj kev txi loj tshaj plaws rau peb lawm, xwv kom peb yuav txais tau txoj sia uas nyob mus ib txhis thiab kev tsa nto hauv Leej Txiv Saum Ntuj Ceeb Tsheej lub nceeg vaj. Kuv thov Vajtswv li no, thiab hais li no los ntawm peb tus Cawm Seej, tus Tswv Yexus Khetos lub npe, amees.

#### LUS CIM

1. Joseph F. Smith, hauv Conference Report, Kaum Hli Ntuj. 1902, 3.
2. Saib Vilson Felipe Santiago thiab Linda Ritchie Archibald, "From Amazon Basin to Temple," *Church News*, Peb Hlis Ntuj hnuv tim 13, 1993, 6.
3. Saib C. Jay Larson, "Temple Moments: Impossible Desire," *Church News*, Peb Hlis Ntuj hnuv tim 16, 1996, 16.
4. Heber C. Kimball, hauv Orson F. Whitney, *Life of Heber C. Kimball (1945)*, 67.
5. *Teachings of Presidents of the Church: Joseph F. Smith (1998)*, 247.
6. *The Teachings of Spencer W. Kimball*, tus kho ntawv Edward L. Kimball (1982), 301.
7. Janice Kapp Perry, "I Love to See the Temple," *Children's Songbook*, 95.

# Kev Qhia rau Peb lub Caij Nyoog

**T**ej zaj lus qhia hauv pawg Pov Thawj Hwj Mekixedes thiab lub Koom Haum Niam Tsev tej kev sib ntsib thaum hnuv Sunday thib plaub yuav yog tsom ntsoov tej “Kev Qhia rau Peb lub Caij Nyoog.” Txhua zaj lus qhia yus npaj tau los ntawm ib zaj los yog ob peb zaj lus hais los ntawm lub tuam rooj sab laj uas muaj tsis ntev tas los no. Ceg txheem ntseeg thiab koog chaw cov thawj tswj hwm xaiv tau tej zaj lus hais uas tsim nyog siv, los yog lawv muab lub luag hauj lwm no so rau cov npis sov los yog ceg ntseeg cov thawj tswj hwm xaiv los tau thiab. Cov thawj coj yuav tsum hais lus txhawb nqa qhov uas cov kwv tij hauv pawg Pov Thawj Hwj Mekixedes thiab cov viv ncaus hauv lub Koom Haum Niam Tsev kawm tib cov lus hais thaum tib hnuv Sunday.

Tsim nyog cov mej zeej uas koom tej kev qhia no thaum hnuv Sunday thib plaub kawm thiab nqa tuaj rau hoob kawm ntawv vaj lug kub tsab ntawv xov xwm uas muaj cov lus hais tom lub tuam rooj sab laj zaum tas los nyob haud.

## Tej Tswv Yim rau Kev Npaj ib zaj Lus Qhia los ntawm cov Lus Hais

Thov Vajtswv kom tau tus Vaj Ntsuj Plig Dawb Huv nrog koj nyob thaum koj kawm thiab qhia txog cov lus hais. Tej zaum koj yuav xav npaj zaj lus qhia siv lwm yam ntaub

ntawv xov xwm, tiam sis cov lus uas tau hais tom lub tuam rooj sab laj yog cov lus kawm uas lub koom txoos twb pom zoo rau lawm. Koj lub luag hauj lwm no yog kom pab lwm tus neeg kawm thiab ua neej raws li txoj moo zoo raws li tau qhia tawm hauv lub Koom Txoos lub tuam rooj sab laj uas tau muaj tsis ntev tas los no.

Ke tshab xyuas cov lus hais ke nrhiav kom tau tej ntsiab cai thiab tej lus qhuab qhia uas yuav pab cov kawm zoo tshaj. Tsis tas li ntawd, ua tib zoo nrhiav kom tau tej dab neeg, tej nqes vaj lug kub, thiab tej lus los ntawm cov lus hais uas yuav pab koj qhia tej qhov tseeb no.

Npaj ib tug txheej txheem qhia kev saib yuav ua li cas qhia tej ntsiab cai thiab tej lus qhuab qhia. Koj tus txheej txheem qhia kev no yuav tau muaj ib co lus nug uas yuav pab cov kawm:

- Nrhiav kom tau tej ntsiab cai thiab tej lus qhuab qhia.
- Xav saib tej ntawd lub ntsiab txhais li cas tiag.
- Qhia tawm tej yam uas koj to taub, tej tswv yim, tej yam uas muaj los rau koj, thiab koj tej lus tim khawv txog tej no.
- Qhia saib yuav ua li cas coj tej ntsiab cai thiab tej lus qhuab qhia no los mus siv hauv lawv lub neej.

Hli	COV NTAUB NTAWV QHIA THAUM HNUV SUNDAY THIB PLAUB
Tsib Hlis Ntuj 2011– Kaum Hli Ntuj 2011	Tej zaj lus uas luam tawm thaum lub Tsib Hlis Ntuj 2011 <i>Liahona</i> *
Kaum Ib Hlis Ntuj 2011– Plaub Hlis Ntuj 2012	Tej zaj lus uas luam tawm thaum lub Kaum Ib Hlis Ntuj 2011 <i>Liahona</i> *

\* Cov lus hais no muaj txawm peem (ua ntau yam lus) nyob rau ntaum conference.lds.org.



**Los ntawm Thawj Tswj Hwm Henry B. Eyring**  
Tus Pab Cuam thib Ib hauv Thawj Pawg Thawj Tswj Hwm

# Tej Cib Fim Ua tej Yam Zoo

*Tus Tswv txoj kev pab cov neeg uas xav tau kev pab yuav tsum muaj cov neeg uas vim yog lawv txoj kev hlub lwm tus neeg muab lawv tus kheej thiab lawv tej ntiag tug tshwj tseg rau Vajtswv thiab Nws txoj hauj lwm.*

**K**uv cov kwv tij thiab cov muam kuv lub ntsiab lus no yog kom hwm thiab ua koob tsheej nco txog tej yam uas tus Tswv tau ua thiab tseem tab tom ua kom pab cov neeg pluag hauv Nws cov me nyuam uas nyob hauv lub ntiag teb no. Nws hlub Nws cov me nyuam uas xav tau kev pab thiab nws kuj hlub cov neeg uas xav pab lawv thiab. Thiab Nws tau npaj tej kev yuav foom koob hmoov rau cov uas xav tau kev pab thiab cov uas pab huv tib si.

Peb Leej Txiv Saum Ntuj Ceeb Tsheej hnov Nws cov me nyuam tej lus thov rau Nws thoob plaws lub ntiag teb no kom tau mov noj, ris tsho hnav, thiab kom tau kev koob lawv tus kheej. Tej kev thov txog Nws zoo li no Nws yeej hnov txij thaum Nws muab txiv neej thiab poj niam tso rau hauv lub ntiag teb no.

Nej hnov txog tej kev xav tau kev pab no, txawm yog nyob hauv nej koog zej zog los yog nyob thoob

plaws lub ntiag teb. Feem ntau, nej muaj siab xav pab heev. Thaum nej ntsib ib tug neeg uas nrhiav hauj lwm nyuaj, nej kuj muaj lub siab xav pab thiab. Nej muaj lub siab xav pab thaum nej mus xyuas ib tug poj ntsuam thiab pom tias nws tsis muaj khoom noj. Nej muaj lub siab xav pab thaum nej pom tej duab txog cov me nyuam uas quaj vim yog lawv lub tsev raug puas tsuaj los ntawm ib qho av qeeg los yog hluav taws kub.

Vim tus Tswv hnov tau lawv cov lus thov txog Nws thiab Nws paub txog nej txoj kev khuv leej lawm, Nws yeej los ib txwm npaj ib txoj kev rau Nws cov thwj tim pab lwm tus neeg. Vajtswv tau caw Nws cov me nyuam kom muab lawv lub sij hawm, lawv tej ntiag tug, thiab lawv tus kheej tshwj tseg thiab nrog Nws koom pab lwm tus neeg.

Qee zaum Vajtswv txoj kev pab lwm tus neeg no yog hu ua ua neej

raws li kev tshwj tseg. Hos lwm lub caij, Nws txoj kev no yog hu ua txheej txheem koom siab. Niaj hnuv nim no yog hu ua lub Koom Txoos txoj kev pab tib neeg.

Tej npe thiab tej kev khiav hauj lwm yeej hloov me ntsis kom phim tej yam uas cov neeg xav tau xav yuav. Txawm yog li ntawd los, tus Tswv txoj kev pab cov neeg uas xav tau kev pab yuav tsum muaj cov neeg uas vim yog lawv txoj kev hlub lwm tus neeg muab lawv tus kheej thiab lawv tej ntiag tug tshwj tseg rau Vajtswv thiab Nws txoj hauj lwm.

Vajtswv caw thiab txib kom peb koom Nws tej hauj lwm pab cov neeg uas xav tau kev pab. Peb khi lus hais tias peb yuav ua li ntawd thaum peb ua kev cai raus dej thiab nyob hauv Vajtswv tej tuam tsev dawb huv. Peb rov qab cog lus li qub thaum tej hnuv Caiv thaum peb noj lub cim nco txog.

Hnuv no kuv lub hom phiaj yog kom piav txog ob peb lub cib fim uas Vajtswv tau npaj rau peb kom thiaj pab lwm tus neeg. Kuv hais tsis tau txog tej no txhij txhua tam sim no. Kuv tsuas cia siab hais tias kuv yuav pab ntxiv dag zog rau nej kom nej thiaj pab tau lwm tus neeg raws li nej lub siab xav.

Muaj ib zaj nkauj hais txog tus Tswv txoj kev caw los pab no uas kuv tau hu txij thaum kuv yog ib tug me nyuam tub. Thaum kuv tseem me kuv nyiam lub suab nkauj ntau dua lub hwj chim ntawm cov lus. Kuv thov Vajtswv hais tias nej yuav hnov tau lub hwj chim ntawm cov lus nkauj no hnuv no. Cia peb mloog cov lus ntawd dua ib zaug:

*Hnub no kuv puas tau ua ib yam  
zoo hauv lub ntiaj teb no?  
Kuv puas tau pab leej tug uas xav  
tau kev pab?  
Kuv puas tau ua rau cov neeg tu  
siab muaj kev zoo siab?  
Yog tias tsis tau, ces kuv tau  
poob qab.  
Kuv puas tau pab kom leej tug tej  
nra haj yam sib  
Vim kuv muaj lub siab xav pab?  
Puas tau pab cov neeg mob thiab  
cov neeg sab ua neej nyob?  
Thaum lawv xav tau kuv txoj kev  
pab kuv puas tau nyob ntawd?  
Ces sawv los thiab ua ib yam  
zoo dua  
Qhov uas ua npau suav txog nej  
lub tsev saum ntuj.  
Kev ua zoo ua rau yus zoo siab,  
ua rau yus xyiv fab,  
Ib txoj koob hmoov ntaum kev  
hlub.<sup>1</sup>*

Tus Tswv ib sij xa xov rau peb kom peb sawv los pab. Tej zaum yog thaum peb muaj lub siab xav khuv leej ib tug neeg uas xav tau kev pab. Tej zaum ib tug txiv tsev yuav xav li no thaum nws pom nws tus me nyuam ntog thiab txhuam nws lub hauv caug. Tej zaum ib tug niam tsev yuav xav li no thaum nws hnov nws ib tug me nyuam qw ntshai thaum hmo ntuj. Los yog tej zaum ib tug tub hluas los yog ntxhais hluas muaj kev khuv leej rau lwm tus neeg uas tu siab los yog ntshai nyob tom tsev kawm ntawv.

Peb txhua tus tau muaj ib lub siab xav hlub tshua lwm tus neeg uas peb yeej tsis paub hlo li. Piv xam hais tias thaum nej hnov xov xwm hais txog qhov av qeeg hauv tus dej hiav txwv Pacific uas ua rau tej twv dej hiav txwv nplawm teb chaws Nyij Pooj, nej puav leej muaj kev khuv leej thiab kev txhawj xeeb txog cov neeg uas raug mob.

Nej coob tug kuj hlub tshua cov neeg uas raug dej nyab hauv Queensland, Austalias. Feem ntau tej xov xwm kwv yees qhia saib pes tsawg tus neeg xav tau kev pab. Tiam sis nej coob tug paub hais tias cov

neeg raug mob npaum li cas. Kam ntau tshaj 1500 tus mej zeej ntawm lub Koom Txoos hauv Austalias tau tuaj mus pab thiab nplij lawv siab.

Lawv muab qhov uas lawv xav pab hloov uas qhov uas lawv sawv kev mus pab raws li lawv tej kev khi lus tseg. Kuv tau pom tej koob hmoov uas los rau tus neeg uas xav tau kev pab thiab txais qhov kev pab ntawd, thiab tus neeg uas siv lub cib fim mus pab lwm tus neeg huv tib si.

Cov niam txiv txawj ntse pom tej cib fim pab lwm tus neeg ua ib txoj kev koj koob hmoov rau lawv cov tub thiab cov ntxhais lub neej. Tsis ntev tas los no, peb tug me nyuam tau nqa ib pluag mov tuaj pub rau kuv tsev neeg. Peb tug me nyuam ntawd niam thiab txiv paub tias kuv tsev neeg xav tau kev pab, thiab muab lub cib fim rau nkawd cov me nyuam pab peb.

Ob niam txiv ntawd tau foom koob hmoov rau kuv tsev neeg vim yog lawv txoj kev pab ntawd. Vim yog nkawd cia nkawd cov me nyuam pab, tej koob hmoov uas nkawd txais no kuj txuas mus rau nkawd cov me nyuam xeeb ntxwv thiab. Thaum cov me nyuam ncaim kuv lub tsev mus, lawv luag nyav thiab qhov ntawd ua rau kuv xav tias yuav muaj li kuv hais tiag. Thaum lawv muaj me nyuam, lawv yuav qhia lawv cov me nyuam txog qhov kev xyiv fab uas lawv muaj thaum lawv pab tus Tswv. Thaum kuv tseem me, kuv nco txog qhov uas txaus siab heev thaum kuv ua raws li kuv txiv hais thiab pab dob nroj rau peb ib tug neeg zej zog. Thaum twg leej twg caw kuv los pab, kuv nco qab txog thiab ntseeg zaj nkauj hais tias, "Txoj Hauj Lwm Zoo Kawg Nkaus, kuv tus Vajtswv, kuv tus Vaj Ntxwv."<sup>2</sup>

Kuv paub hais tias cov lus nkauj ntawd yog sau kom ua tau piv txwv rau qhov kev zoo siab uas los ntawm txoj kev teev tiam tus Tswv thaum Hnub Caiv. Tiam sis cov me nyuam uas pab peb ntawd muaj kev zoo siab ua tus Tswv tej hauj lwm txawm tias tsis yog hnub caiv. Thiab lawv niam txiv tau pom ib lub cib fim ua zoo rau lwm tus neeg thiab faib qhov kev

xyiv fab ib tiam dhau ib tiam mus.

Tus Tswv txoj kev saib xyuas cov neeg txom nyem kuj muab dua ib lub cib fim rau niam txiv foom koob hmoov rau lawv cov me nyuam. Muaj ib hnub Caiv kuv pom qhov no hauv lub tsev teev ntuj. Muaj ib tug me nyuam cev lub hnab nyiaj pub rau tus npis sov thaum tus me nyuam tub nkag chav teev ntuj ua ntej txoj kev sib ntsib noj lub cim nco txog.

Kuv paub tus me nyuam tub ntawd thiab nws tsev neeg. Nws tsev neeg tau kawm txog ib tug neeg hauv lawv pawg ntseeg uas txom nyem. Tus txiv tsev tau qhia tus me nyuam ntawd li ntawd thaum nws muab nyiaj pub ib nyuag loj zog ntim rau hauv lub hnab ntawv nws hais tias: "Peb tau yoo mov thiab thov Vajtswv pab cov neeg pluag lawm. Thov muab lub hnab ntawv no cev rau tus npis sov. Kuv paub hais tias nws yuav muab cov nyiaj no pub rau lawv cov uas xav tau kev pab ntau dua peb."

Hnub Caiv ntawd tus me nyuam tub ntawd yuav tsis nco qab hais tias nws tshaib plab li, nws yuav nco ntsoov hais tias nws lub siab sov so. Kuv paub thaum nws luag nyav thiab tuav raws lub hnab ntawv hais tias nws zoo siab uas nws txiv tso siab rau nws nqa cov nyiaj mus pab cov neeg txom nyem. Nws yuav nco ntsoov hnub ntawd thaum nws ua ib tug dis kas, thiab tej zaum tas mus li.

Kuv pom qhov kev zoo siab ntawd hauv cov neeg uas tau sawv cev rau tus Tswv pab ib co neeg hauv lub xeev Idaho ntau xyoo dhau los. Teton qhov chaw tauv dej tau tawg thaum hnub Saturday, lub Rau Hli Ntuj hnub tim 5, 1976. Kaum ib tug neeg raug tuag. Coob tug neeg yuav tsum ncaim lawv tej vaj tse sai. Qee lub tsev raug dej nyab tshoob mus. Thiab ntau lub tsev raug puas tsuaj npaum li tias yuav tsum muaj kev pab ntau kom cov neeg thiaj rov qab nyob tau haud.

Cov neeg uas hnov txog qhov kev txom nyem no kuj muaj kev hlub tshua rau cov neeg no thiab xav pab lawv. Cov neeg zej zog, cov npis sov, lub Koom Haum Niam Tsev cov thawj

tswj hwm, lwm cov thawj coj, cov neeg qhia tom tsev, thiab cov saib xyuas tom tsev tau tso lawv tej tsev thiab tej hauj lwm tseg kom thiaj mus pab tau lwm tus neeg tu lawv tej tsev uas raug dej nyab.

Muaj ib khub niam txiv uas tau mus yos teb chaws thiab rov qab los rau lub zos Rexburg tom qab qhov dej nyab ntawd. Nkawd tsis mus xyuas nkawd lub tsev. Tiam sis, nkawd mus nrhiav kom tau nkawd tus npis sov thiab noog saib nkawd yuav pab tau li cas. Tus npis sov hais kom nkawd mus pab ib tse neeg uas xav tau kev pab.

Tom qab ob peb hnuv nkawd mus xyuas kawd lub tsev. Nkawd lub tsev twb raug dej nyab tshoob mus lawm. Nkawd rov qab mus ntsib tug npis sov thiab noog hais tias, “Nim no, koj xav kom wb pab li cas?”

Txawm tias nej nyob qhov twg los xij, nej pom tau qhov uas muaj lub siab xav pab hloov ua qhov pab tiag. Tej zaum yuav tsis yog pab vim yog muaj kev puas tsuaj li cas. Kuv tau pom qhov no hauv ib pawg pov thawj hwj uas muaj ib tug neeg uas sawv thiab piav txog ib tug txiv neej los yog ib tug poj niam uas xav tau ib lub cib fim ua hauj lwm koob lawv tus kheej los yog lawv tsev neeg. Kuv pom tau tias cov neeg hauv hoob ntawd muaj lub siab xav pab, tiam sis ib txhia kuj tau qhia txog ob peb tug neeg uas paub cov chaw uas ntiav neeg.

Qhov uas muaj los hauv pawg pov thawj hwj ntawd thiab qhov uas muaj los pab tej tsev neeg uas raug dej nyab hauv Idaho yeej qhia txog tus Tswv txoj kev pab cov neeg txom nyem kom lawv thiaj rov qab saib xyuas thiab tu lawv tus kheej tau dua. Peb muaj lub siab xav pab thiab peb paub hais tias peb yuav tsum ua li cas pab raws li tus Tswv lub siab xav.

Xyoo no peb ua koob tsheej nco txog xyoo thib 75 txij thaum lub Koom Txoos tau tsim lub Koom Txoos txoj Kev Pab Tib Neeg. Tau pib muaj txoj kev pab no kom thiaj pab tau cov neeg uas poob hauj lwm, poob daim teb qoob loo, thiab poob tsev thaum lub caj hu ua “Kev Txom Nyem Loj.”

Peb Leej Txiv Saum Ntuj cov me nyuam tej kev xav tau kev pab rov qab muaj hauv peb lub caj nyooog no thiab yeej yuav muaj ntxiv yav tom ntej thiab. Tej ntsiab cai ntawm lub Koom Txoos txoj Kev Pab Tib Neeg tsis yog rau lub caj nyooog no los yog ib qho chaw nkaus xwb. Yeej yog rau txhua lub caj nyooog thiab txhua qhov chaw.

Tej ntsiab cai no yog los ntawm sab ntsuj plig los thiab nyob mus ib txhis. Vim yog qhov ntawd, thaum peb to taub tej ntsiab cai no thiab cia tej no nkag hauv peb lub siab lub ntsws, peb yuav pom tau thiab siv tau tej cib fim uas muaj los rau peb pab lwm tus neeg.

Nram qab no yog ob peb txoj ntsiab cai uas tau coj kuv kev thaum kuv xav pab raws li tus Tswv txoj kev thiab thaum lwm tus neeg tau pab kuv.

Qhov thib ib, sawv daws haj yam zoo siab thiab saib lawv tus kheej rau nqi zoo dua thaum lawv koob tau lawv tus kheej thiab lawv tsev neeg ua ntej tso, lawv mam li cev tes mus pab lwm tus neeg. Kuv yeej zoo siab ua tsaug rau cov neeg uas tau pab kuv. Kuv kuj zoo siab tau ntau xyoo no rau lawv cov uas tau pab kuv vam khom kuv tus kheej. Thiab kuv kuj zoo siab ua tsaug rau lawv cov uas qhia kuv siv kuv cov nyiaj seem pab lwm tus neeg.

Kuv tau kawm hais tias yog tias kuv yuav muaj nyiaj seem, kuv yuav tsum siv nyiaj tsaug dua cov nyiaj kuv khwv tau. Vim kuv muaj qhov nyiaj seem ntawd kuv kawm paub tias qhov uas peb muab pub rau lwm tus neeg yeej zoo dua qhov uas txais dab tsi ntawm lwm tus. Twb yog rau qhov uas thaum peb pab lwm tus neeg raws li tus Tswv qhia tseg, Nws pab foom koob hmoov rau peb.

Thawj Tswj Hwm Marion G. Romney hais txog kev pab tib neeg hais tias, “Nej yeej yuav muab tsis tau pub rau lwm tus neeg es thaum kawg yuav pluag” Ces nws hais nws tus thawj tswj hwm ntawm nws qhov chaw tshaj tawm txoj moo zoo cov lus, Melvin J. Ballard, hais tias: “Ib tug neeg twg yuav muab tsis tau ib txhais khob cij pub rau tus Tswv es tus Tswv

tsis muab ib pob khob cij rov qab ntxiv rau nws.”<sup>3</sup>

Hauv kuv lub neej mas kuv pom tias qhov no muaj tseeb tiag. Thaum kuv ua siab dawb pub pab rau Leej Txiv Saum Ntuj Ceeb Tsheej cov me nyuam, ces Nws kuj ua siab dawb paug rau kuv ib yam.

Muaj dua ib txoj ntsiab cai ntawm txoj moo zoo uas tau coj kuv kev uas yog lub hwj chim thiab txoj koob hmoov ntawm kev nrog lwm tus neeg koom tes pab. Thaum peb sib koom tes pab cov neeg uas xav tau kev pab, tus Tswv muab peb tej siab khi ua ib ke. Thawj Tswj Hwm J. Reuben Clark Jr. hais lis no hais tias: “Qhov kev pub pab ntawd . . . tej zaum ua rau kuv xav hais tias kuv nrog lwm tus neeg sib koom siab sib koom tes ua hauj lwm pab cov neeg txom nyem.”<sup>4</sup>

Qhov uas nrog lwm tus neeg sib koom siab kuj muaj tseeb rau tus neeg txais kev pab thiab. Muaj ib tug neeg uas nrog kuv mus kaus av nkos tawm ntawm nws lub tsev uas raug dej nyab thiab nws nrog kuv koom siab txog niaj hnuv nim no. Thiab nws kuj saib tau nws tus kheej rau nqi vim nws tau ua ntau yam pab nws tus kheej thiab nws tsev neeg. Yog tias wb nyias tau ua nyias hauj lwm ces wb ob leeg yuav xiam ib txoj koob hmoov ntawm tus ntsuj plig tib si.

Ces muaj ib txoj ntsiab cai thib peb uas pab kuv pab lwm tus neeg: Caw koj tsev neeg los pab khiav tej hauj lwm pab lwm tus neeg no kom lawv thiaj kawm tau txoj kev uas ib leeg hlub ib leeg thaum lawv pab lwm tus neeg. Nej cov tub thiab cov ntxhais uas nrog nej ua hauj lwm pab lwm tus neeg txom nyem yuav muaj lub siab xav sib pab thaum lawv ib tug twg xav tau kev pab.

Txoj ntsiab cai thib plaub ntawm lub Koom Txoos txoj Kev Pab Tib Neeg kuv tau kawm thaum kuv ua ib tug npis sov. Kuv kawm thaum kuv ua raws li cov vaj lug kub hais thiab nrhiav kom tau cov neeg pluag. Twb yog tus npis sov lub luag hauj lwm kom nrhiav tau thiab pab cov neeg uas tseem xav tau kev pab tom qab



lawv ua txhua yam uas lawv thiab lawv tsev neeg ua tau. Kuv pom tias tus Tswv xa tus Vaj Ntsuj Plig Dawb Huv kom pab yus “nrhiav thiab nrhiav tau”<sup>5</sup> thaum saib xyuas thiab pab cov neeg pluag ib yam li thaum nrhiav kom tau qhov tseeb. Tiam sis kuv kuj tau kawm hais tias yuav tsum thov lub Koom Haum Niam Tsev tus thawj tswj hwm los pab nrhaiv thiab. Tej zaum nws yuav txais kev tshwm sim ua ntej koj txais.

Nej ib txhia yuav xav tau tej kev tshoov siab ntawd nyob rau lub sij hawm tom ntej. Kom thiaj ua koob tsheej nco txog xyoo thib 75 txij thaum txhim tsa lub Koom Txoos txoj kev pab tib neeg, cov mej zeej nyob thoob plaws lub ntiaj teb yuav koom ua ib hnuv pab lwm tus neeg. Cov thawj coj thiab cov mej zeej yuav thov kom tau kev tshwm sim tshoov lawv tej siab ntsws thaum lawv npaj tej kev pab no.

Kuv xav pab qhia peb lub tswv yim rau nej siv thaum nej npaj pab lwm tus neeg.

Qhov thib ib, npaj nej tus kheej rau ntawm sab ntsuj plig. Tsuas yog tus Cawm Seej txoj Kev Theej Txhoj thiaj ua kom nej pom tau lub hom phiaj ntawd txoj kev pab lwm tus neeg ua qhov koob hmoov ntawm sab ntsuj pliag thiab cev nqaj daim tawv rau peb Leej Txiv Saum Ntuj Ceeb Tsheej cov me nyuam lub neej.

Qhov thib ob, ces mus pab ib tug neeg twg hauv lub nceeg vaj los sis hauv lub koog zej zog uas xav tau nej txoj kev pab es lawv txoj kev xav tau ntawd yuav tshoov cov neeg uas xav

pab lub siab lub ntsws. Cov neeg uas nej pab yuav pom tias nej hlub lawv. Tej zaum ua li zaj nkauj hais, qhov kev pab no yuav ua rau lawv zoo siab xwb, es ho pab tsis tau lawv lub cev nqaj daim tawv.

Qhov kawg ces nrhiav kev pab ntawm tsev neeg, tej pawg pov thawj, cov koom haum pab, thiab cov neeg uas nej paub hauv nej lub zos. Yuav muaj txoj kev sib koom siab vim nej txoj kev pab rau lwm tus neeg. Thiab txoj kev sib koom siab no hauv tsev neeg, hauv lub Koom Txoos, thiab hauv nej lub zos yuav loj hlob tuaj thiab nyob ntev mus.

Nov yog ib lub sij hawm rau kuv ua nej tsaug ntau ntau. Vim nej tau pab tus Tswv, kuv tau ntsib cov neeg uas nej tau pab no thoob plaws ntiaj teb, lawv ua nej tsaug.

Nej tau txhawb nqa lawv thaum nej pab raws li tus Tswv txoj kev pab. Nej thiab tus Cawm Seej cov thwj tim uas zoo li nej uas tau pab lwm tus neeg, cov neeg uas nej tau pab ntawd ho tau ua nej tsaug rau kuv lawm.

Cov neeg uas tau nrog nej ua hauj lwm ua ke los kuj ua nej tsaug thiab. Kuv nco tau tias muaj ib zaug kuv sawv ntawm Thawj Tswj Hwm Ezra Taft Benson ib sab. Wb tau sib tham txog kev pab lwm tus neeg hauv tus Tswv lub Koom Txoos. Nws ua rau kuv xav tsis thoob li thaum nws cia li hais tias, “Kuv nyiam qhov hauj lwm no heev li, thiab yeej yog kev ua hauj lwm tiag tiag!”

Sawv cev rau tus Tswv, kuv ua tsaug rau tej hauj lwm uas nej tau ua pab rau peb Leej Txiv Saum Ntuj

Ceeb Tsheej cov me nyuam. Nws paub nej zoo thiab Nws pom nej tej kev sib zog, kev rau siab thiab kev txi. Kuv thov Vajtswv kom Nws foom koob hmoov rau nej kom nej pom tau qhov zoo tuaj ntawm cov neeg uas nej tau pab rau tus Tswv lawm.

Kuv paub hais tias Vajtswv uas yog Leej Txiv muaj sia nyob thiab hnov peb tej lus thov. Kuv paub hais tias Yexus yog tus Khetos. Nej thiab cov neeg uas nej tau pab yuav muaj kev dawb huv thiab kev ntxiv dag zog thaum nej pab lwm tus ntxiv mus thiab ceev Nws tej lus txib. Nej yeej paub li kuv paub, tias los ntawm lub hwj chim ntawm tus Vaj Ntsuj Plig Dawb Huv, ces Yauxej Xamiv yog Vajtswv tus yaj saub uas tau muab lub Koom Txoos uas muaj tseeb thiab muaj nyob tam sim no txum tim rov qab los. Kuv ua tim khawv hais tias Thomas S. Monson yog Vajtswv tus yaj saub uas muaj sia nyob. Nws yog ib tug yam ntxwv zoo txog qhov uas Vajtswv tau ua: tawm mus ua tej yam hauj lwm zoo. Kuv thov kom peb yuav ua raws li tej cib fim uas peb muaj “es txhawb nqa tej tes uas qaug zog lawm, thiab ntxiv dag ntxiv zog rau txhais ceg uas qaug tas.”<sup>6</sup> Los ntawm Yexus Khetos lub npe dawb ceev, amees.

#### LUS CIM

1. “Have I Done Any Good?” *Hymns*, naj npawb 223.
2. “Sweet Is the Work,” *Hymns*, naj npawb 147.
3. Marion G. Romney, “Welfare Services: The Savior’s Program,” *Ensign*, Kaum Ib Hlis Ntuj 1980, 93.
4. J. Reuben Clark Jr., hauv Conference Report, Kaum Hli Ntuj 1943, 13.
5. Saib Mathais 7:7–8; Lukas 11:9–10; 3 Nifais 14:7–8.
6. Doctrine and Covenants 81:5.